



MALAYSIA

Warta Kerajaan

SERI PADUKA BAGINDA

DITERBITKAN DENGAN KUASA

HIS MAJESTY'S GOVERNMENT GAZETTE

PUBLISHED BY AUTHORITY

Jil. 47
No. 12

12hb Jun 2003

*TAMBAHAN No. 58
PERUNDANGAN (A)*

P.U. (A) 185.

AKTA PILIHAN RAYA 1958

**PERATURAN-PERATURAN PILIHAN RAYA
(PENGUNDIAN POS) 2003**

SUSUNAN PERATURAN

BAHAGIAN I

PERMULAAN

Peraturan

1. Nama, permulaan kuat kuasa dan pemakaian
2. Tafsiran

BAHAGIAN II

PENGUNDI POS

3. Orang yang berhak untuk mengundi sebagai pengundi pos
4. Bentuk kertas undi pos

BAHAGIAN III

PENGELUARAN KERTAS UNDI

Peraturan

5. Orang yang berhak hadir pada masa pengeluaran kertas undi pos dan pembukaan peti undi pengundi pos
6. Notis tentang pengeluaran kertas undi pos
7. Penandaan kertas undi pos
8. Dokumen yang hendaklah dihantar kepada pengundi pos
9. Penghantaran kertas undi pos
10. Pengadaan peti undi pengundi pos
11. Pengelakan senarai pengundi pos dan kaunterfoil kertas undi
12. Penggunaan undi pos
13. Penerimaan sampul iringan

BAHAGIAN IV

PEMBUKAAN PETI UNDI PENGUNDI POS

14. Membuka peti undi pengundi pos
15. Membuka sampul iringan
16. Pengelakan undi yang ditolak dan Borang 2
17. Membuka sampul A

BAHAGIAN V

AM

18. Tatacara apabila didapati ada lebih daripada satu kertas undi
19. Pengundi pos tidak boleh hadir untuk mengundi
20. Pembatalan

JADUAL

AKTA PILIHAN RAYA 1958

PERATURAN-PERATURAN PILIHAN RAYA (PENGUNDIAN POS) 2003

PADA menjalankan kuasa yang diberikan oleh seksyen 16 Akta Pilihan Raya 1958 [Akta 19], Suruhanjaya Pilihan Raya, dengan kelulusan Yang di-Pertuan Agong, membuat peraturan-peraturan yang berikut:

BAHAGIAN I

PERMULAAN

Nama, permulaan kuat kuasa dan pemakaian

1. (1) Peraturan-peraturan ini bolehlah dinamakan **Peraturan-Peraturan Pilihan Raya (Pengundian Pos) 2003**.

(2) Peraturan-Peraturan ini mula berkuat kuasa pada 16 Jun 2003.

(3) Peraturan-Peraturan ini hendaklah dibaca bersekali dengan Peraturan-Peraturan Pilihan Raya (Penjalanan Pilihan Raya) 1981 [*P.U. (A)386/1981*].

Tafsiran

2. Dalam Peraturan-Peraturan ini, melainkan jika konteksnya menghendaki makna yang lain—

“Borang 2” ertinya suatu perisytiharan identiti seseorang pengundi pos dan yang mempunyai nombor kertas undi;

“ejen” termasuklah ejen pilihan raya atau mana-mana orang yang dilantik untuk hadir bagi menggantikan ejen pilihan raya;

“kertas undi pos” ertinya suatu kertas undi yang dikeluarkan kepada seorang pengundi pos;

“mengeluarkan” termasuklah pengeluaran kertas undi pos yang asal dan mana-mana pengeluaran yang berikutnya;

“pengundi pos” ertinya mana-mana orang yang berhak untuk mengundi di bawah peraturan 3;

(Dipotong oleh P.U. (A) 215/2024).

“sampul A” ertinya suatu sampul iringan yang mempunyai perkataan “sampul kertas undi” dan “nombor kertas undi”;

“sampul B” ertinya suatu sampul iringan yang mempunyai perkataan “pegawai pengurus” bagi pengembalian sampul A dan Borang 2.

BAHAGIAN II
PENGUNDI POS

Orang yang berhak untuk mengundi sebagai pengundi pos

3. (1) Mana-mana orang yang telah mendaftarkan diri sebagai seorang pemilih Parlimen atau Negeri di bawah Peraturan-Peraturan Pilihan Raya (Pendaftaran Pemilih) 2002, dan ialah—

- (a) *(Dipotong oleh P.U. (A) 215/2024).*
- (b) seorang yang diperakui oleh Suruhanjaya Pilihan Raya sebagai seorang pegawai pilihan raya dan kena menjalankan tugas pada hari mengundi;
- (c) seorang anggota mana-mana pasukan polis yang ditubuhkan oleh manamana undang-undang bertulis yang berkuat kuasa di Malaysia, selain seorang anggota Pasukan Polis Sukarela Simpanan;
- (d) seorang anggota mana-mana perkhidmatan awam yang pada hari mengundi diambil bekerja sepenuh masa dalam suatu jawatan di luar Semenanjung Malaysia atau Sabah atau Sarawak;
- (e) seorang anggota Suruhanjaya Pilihan Raya yang dilantik di bawah Perkara 114 Perlembagaan Persekutuan; atau
- (f) seorang anggota mana-mana kategori orang yang ditetapkan sebagai pengundi pos oleh Suruhanjaya Pilihan Raya dari semasa ke semasa melalui pemberitahuan dalam *Warta*,

adalah, apabila diterimanya suatu kertas undi pos, berhak untuk mengundi sebagai pengundi pos pada sesuatu pilihan raya mengikut Peraturan-Peraturan ini.

(2) Orang yang disebut dalam perenggan (1)(b), (d), (e) dan (f) yang berhasrat untuk mengundi melalui pos boleh memohon untuk berbuat demikian dengan menggunakan Borang 1 dalam Jadual.

(3) Permohonan itu hendaklah dibuat terus kepada pegawai pengurus bahagian pilihan raya tempat dia didaftarkan melalui mana-mana Pegawai Pilihan Raya Negeri sesuatu Negeri sebaik sahaja diketahui bahawa suatu pilihan raya dipertandingkan dalam bahagian pilihan raya itu.

(4) Jika sesuatu permohonan diluluskan, pegawai pengurus hendaklah mengeluarkan suatu kertas undi pos kepada pemohon dan jika permohonan itu tidak diluluskan, pegawai pengurus hendaklah memberitahu pemohon sedemikian dan hendaklah menyatakan alasan-alasan untuk tidak meluluskan permohonan itu dalam surat yang ditetapkan dalam Borang 1.

Bentuk kertas undi pos

4. Kertas undi hendak dihantar kepada pengundi pos dalam bentuk yang sama dengan, dan tidak boleh dibezakan daripada, kertas undi yang telah diserahkan kepada pengundi lain.

BAHAGIAN III

PENGELUARAN KERTAS UNDI

Orang yang berhak hadir pada masa pengeluaran kertas undi pos dan pembukaan peti undi pengundi pos

5. (1) Tiada orang selain—

- (a) pegawai pengurus dan keraninya;
- (b) calon;
- (c) ejen pilihan raya atau orang yang dilantik oleh seseorang calon untuk hadir bagi menggantikan ejen pilihan raya; dan
- (d) anggota atau pegawai Suruhanjaya Pilihan Raya,

boleh hadir pada masa prosiding pengeluaran kertas undi pos atau pembukaan peti undi pengundi pos.

(2) Jika seseorang calon melantik seseorang di bawah perenggan (1)(c), dia hendaklah memberikan notis mengenai pelantikan itu kepada pegawai pengurus, dengan menyatakan nama dan alamat orang yang dilantik sedemikian pada bila-bila masa semasa pengeluaran kertas undi pos atau pembukaan peti undi pengundi pos tersebut, mengikut mana-mana yang berkenaan.

(3) Jika seseorang yang disebut dalam subperaturan (2) mati atau menjadi tidak upaya untuk bertindak, calon boleh melantik seorang yang lain bagi menggantikan orang itu dan hendaklah dengan serta-merta memberikan notis bertulis kepada pegawai pengurus tentang nama dan alamat orang yang dilantik sedemikian.

(4) Seseorang calon boleh sendiri membuat apa-apa perbuatan atau benda yang mana-mana ejennya, jika dilantik, akan dibenarkan untuk melakukan, atau boleh membantu ejennya dalam melakukan apa-apa perbuatan atau benda itu.

(5) Jika dalam Peraturan-Peraturan ini apa-apa perbuatan atau benda dikehendaki atau dibenarkan untuk dilakukan di hadapan calon atau ejen mereka, maka ketidakhadiran mana-mana orang atau orang-orang sedemikian pada masa dan di tempat yang ditentukan bagi maksud itu tidak akan menidaksahkan perbuatan atau benda dilakukan itu, jika perbuatan atau benda itu selainnya dilakukan dengan wajar.

Notis tentang pengeluaran kertas undi pos

6. (1) Pegawai pengurus hendaklah memberi setiap calon atau ejen pilihan rayanya tidak kurang daripada dua puluh empat jam notis bertulis tentang masa dan tempat yang pegawai pengurus akan mengeluarkan kertas undi pos.

(2) Jika apa-apa pengeluaran kemudian kertas undi pos akan dibuat, pegawai pengurus hendaklah memberitahu setiap calon atau ejen pilihan rayanya tentang masa dan tempat yang pegawai pengurus akan membuat pengeluaran kemudian itu dengan seberapa cepat yang dapat dilaksanakan.

Penandaan kertas undi pos

7. (1) Setiap kertas undi pos yang dikeluarkan hendaklah ditindik atau dicapkan sebelah belakangnya dengan cop rasmi atau ditandatangani ringkas oleh pegawai pengurus, dan nama dan nombor pemilih hendaklah diteriakkan dan nombor itu hendaklah ditandakan pada kaunterfoil kertas undi.

(2) Suatu senarai hendaklah dibuat tentang orang yang kepadanya kertas undi pos itu telah dihantar tetapi tanpa menunjukkan kertas undi tertentu yang telah dikeluarkan.

(3) Nombor kertas undi pos hendaklah ditandakan dalam Borang 2 dan pada sampul A.

Dokumen yang hendaklah dihantar kepada pengundi pos

8. Pegawai pengurus hendaklah menghantar kepada tiap-tiap pengundi pos dokumen yang berikut:

- (a) kertas undi;
- (b) Borang 2;
- (c) sampul A; dan
- (d) sampul B.

Penghantaran kertas undi pos

9. Segala sampul yang dialamatkan kepada pengundi pos hendaklah dikira dan dengan serta-merta dihantar mengikut perkiraan yang diluluskan terlebih dahulu oleh Suruhanjaya Pilihan Raya.

Pengadaan peti undi pengundi pos

10. (1) Pegawai pengurus hendaklah, semasa prosiding pengeluaran asal kertas undi pos, mengadakan suatu peti undi atau peti-peti undi bagi penerimaan sampul B apabila dikembalikan oleh pengundi pos.

(2) Tiap-tiap peti undi itu hendaklah ditunjukkan sebagai terbuka dan kosong kepada ejen yang hadir dan hendaklah kemudiannya dikunci oleh pegawai pengurus dan dilekatkan dengan perekat keselamatan dan ditandatangani oleh pegawai pengurus dan ejen yang hadir dan yang berhasrat untuk menandatangani perekat keselamatan itu.

(3) Tiap-tiap peti undi itu hendaklah dinomborkan dan ditandakan “peti undi pengundi pos” dan dengan nama bahagian pilihan raya yang baginya pilihan raya itu diadakan.

(4) Pegawai pengurus hendaklah membuat perkiraan bagi penyimpanan selamat tiap-tiap peti undi itu.

Pengelakan senarai pengundi pos dan kaunterfoil kertas undi

11. (1) Pegawai pengurus hendaklah, dengan seberapa cepat yang dapat dilaksanakan selepas selesai pengeluaran kertas undi pos, dan di hadapan ejen, memasukkan ke dalam bungkusan yang berasingan—

- (a) senarai pengundi pos; dan
- (b) kaunterfoil kertas undi yang telah dikeluarkan,

dan hendaklah melekatkan perekat keselamatan pada bungkusan-bungkusan itu.

(2) Bungkusan yang telah dilekatkan dengan perekat keselamatan yang mengandungi senarai pengundi pos boleh dibuka oleh pegawai pengurus bagi maksud pengeluaran yang kemudian, dan setelah selesai pengeluaran yang kemudian itu, senarai itu dan kaunterfoil kertas undi yang telah dikeluarkan itu hendaklah sekali lagi dimasukkan ke dalam bungkusan yang berasingan dan dilekatkan dengan perekat keselamatan mengikut subperaturan (1).

Penggunaan undi pos

12. Seseorang pengundi pos yang berhasrat untuk menggunakan undi posnya hendaklah menggunakannya dengan melengkapkan dan menghantar kertas undi dan Borang 2 mengikut arahan yang dinyatakan untuk pengundi dalam Borang itu.

Penerimaan sampul ringan

13. Pegawai pengurus hendaklah, dengan serta-merta apabila diterimanya sampul B sebelum pukul lima petang pada hari mengundi, meletakkan sampul B itu tanpa dibuka ke dalam suatu peti undi pengundi pos yang telah dikunci dan dilekatkan dengan perekat keselamatan mengikut peraturan 10.

BAHAGIAN IV**PEMBUKAAN PETI UNDI PENGUNDI POS****Membuka peti undi pengundi pos**

14. (1) Setiap peti undi pengundi pos hendaklah dibuka oleh pegawai pengurus dengan kehadiran ejen.

(2) Asalkan pegawai pengurus memastikan bahawa terdapat sekurang-kurangnya satu peti undi pengundi pos bagi penerimaan sampul B hingga pukul lima petang pada hari mengundi, dia boleh membuka peti undi pengundi pos yang lain itu sebelum itu.

(3) Pegawai pengurus hendaklah memberi setiap calon atau ejennya sekurang-kurangnya dua puluh empat jam notis bertulis tentang masa dan tempat bagi pembukaan setiap peti undi pengundi pos dan sampul yang terkandung dalamnya.

Membuka sampul iringan

15. (1) Apabila peti undi pengundi pos dibuka, pegawai pengurus hendaklah mengira dan mencatatkan bilangan sampul B, dan hendaklah kemudiannya membuka setiap sampul B secara berasingan.

(2) Sampul B hendaklah ditandakan “ditolak”—

(a) jika sampul itu tidak mengandungi kedua-dua Borang 2 dan sampul A; atau

(b) jika sampul itu tidak mengandungi kedua-dua Borang 2 dan kertas undi.

(3) Jika sampul B mengandungi hanya sampul A, pegawai pengurus hendaklah membuka sampul A untuk menentukan sama ada Borang 2 ada di dalam sampul itu dan jika didapati sampul itu tidak mengandungi Borang 2, maka sampul B itu hendaklah ditandakan “ditolak”.

(4) Suatu sampul B yang ditandakan “ditolak” berserta dengan kandungannya, jika ada, hendaklah dimasukkan ke dalam suatu bekas yang berasingan.

(5) Semasa membuka sampul B, selain sampul yang disebut dalam subperaturan (3), pegawai pengurus hendaklah mula-mula sekali memuaskan hatinya bahawa Borang 2 telah ditandatangani dan disahkan dengan sewajarnya, dan jika dia tidak berpuas hati, dia hendaklah menandakan pada Borang 2 “perisytiharan ditolak”, mengepilkan pada Borang 2 sampul A atau, jika tiada sampul sedemikian, kertas undi, dan memasukkannya ke dalam bekas bagi undi yang ditolak.

(6) Sebelum memasukkan Borang 2 ke dalam bekas bagi undi yang ditolak, pegawai pengurus hendaklah menunjukkan Borang 2 kepada ejen dan, jika apa-apa bantahan dibuat oleh mana-mana ejen terhadap keputusannya, pegawai pengurus itu hendaklah menambahkan perkataan “penolakan dibantah” pada Borang 2 itu.

(7) Jika nombor pada Borang 2, yang telah ditandatangani dan disahkan dengan sewajarnya, sama dengan nombor pada sampul A, maka pegawai pengurus hendaklah memasukkan Borang 2 ke dalam bekas yang berasingan dan sampul A ke dalam bekas yang lain.

(8) Jika sampul A tiada atau sampul A telah dibuka di bawah subperaturan (3), maka pegawai pengurus hendaklah—

(a) jika nombor pada Borang 2, yang ditandatangani dan disahkan dengan sewajarnya, sama dengan nombor pada kertas undi, memasukkan perisytiharan itu ke dalam bekas bagi perisytiharan identiti dan kertas undi itu ke dalam peti undi yang sebelum itu telah ditunjukkan sebagai terbuka dan kosong kepada ejen-ejen yang hadir dan dikunci oleh pegawai pengurus dan dilekatkan dengan perekat keselamatan dan ditandatangani oleh pegawai pengurus dan ejen-ejen yang berhasrat untuk menandatangani perekat keselamatan itu;

(b) jika nombor pada Borang 2 tidak sama dengan nombor pada kertas undi, menandakan pada Borang 2 “undi ditolak”, mengepilkan kepadanya kertas undi dan memasukkannya ke dalam bekas bagi undi ditolak.

(9) Jika nombor pada Borang 2, yang ditandatangani dan disahkan dengan sewajarnya, tidak sama dengan nombor pada sampul surat atau sampul surat A itu tiada nombor padanya, maka pegawai pengurus boleh membuka sampul itu dan hendaklah—

- (a) jika nombor pada Borang 2 sama dengan nombor pada kertas undi, memasukkan Borang 2 ke dalam bekas bagi Borang 2 dan kertas undi ke dalam peti undi yang disebut dalam perenggan (8)(a); dan
- (b) jika nombor pada Borang 2 tidak sama dengan nombor pada kertas undi atau kertas undi tiada, menandakan pada Borang 2 “undi ditolak”, mengepilkan kepadanya kertas undi, jika ada, dan meletakkannya ke dalam bekas bagi undi ditolak.

(10) Kecuali bagi maksud menentukan di bawah subperaturan (3), sama ada sampul A mengandungi Borang 2 atau di bawah subperaturan (9), sama ada nombor pada Borang 2 sama dengan nombor pada kertas undi, pegawai pengurus tidak boleh membuka sampul A sebelum sampul itu kena dibuka di bawah peraturan 17.

Pengelakan undi yang ditolak dan Borang 2

16. Setelah selesai prosiding di bawah peraturan 15, pegawai pengurus hendaklah memasukkan kandungan dalam bekas bagi undi yang ditolak dan kandungan dalam bekas bagi Borang 2 ke dalam dua bungkusan yang berasingan dan hendaklah melekatkan perekat keselamatan pada bungkusan-bungkusan itu.

Membuka sampul A

17. (1) Selepas perekat keselamatan dilekatkan pada bungkusan-bungkusan yang disebut dalam peraturan 16, pegawai pengurus hendaklah membuka secara berasingan setiap sampul A yang dimasukkan ke dalam bekas bagi sampul A.

(2) Jika sampul A tidak mengandungi suatu kertas undi, pegawai pengurus hendaklah menandakan pada sampul itu “kosong”.

(3) Jika nombor pada sampul A sama dengan nombor pada kertas undi yang terkandung dalam sampul itu, maka pegawai pengurus hendaklah memasukkan kertas undi itu ke dalam peti undi yang disebut dalam perenggan 15(8)(a) dan hendaklah menyetepikan sampul itu bagi pemusnahan segera.

(4) Jika nombor sampul A tidak sama dengan nombor pada kertas undi yang terkandung dalam sampul itu, maka pegawai pengurus hendaklah menandakan pada kertas undi itu “ditolak” dan mengepilkan sampul A kepadanya.

(5) Pegawai pengurus hendaklah meletakkan ke dalam bungkusan-bungkusan yang berasingan sampul-sampul yang ditandakan “kosong” dan kertas-kertas undi yang ditandakan “ditolak” dan hendaklah melekatkan perekat keselamatan pada bungkusan-bungkusan itu.

BAHAGIAN V

AM

Tatacara apabila didapati ada lebih daripada satu kertas undi

18. Pada mana-mana peringkat apabila sampul dibuka mengikut subperaturan 15(1), (3) atau (9) atau subperaturan 17(1), didapati bahawa terdapat lebih daripada satu kertas undi dalam suatu sampul, maka pegawai pengurus hendaklah, selepas memeriksa nombor pada kertas undi itu dengan nombor pada Borang 2 atau sampul A, mengikut mana-mana yang berkenaan, memasukkan kertas undi yang betul ke dalam peti undi yang disebut dalam subperaturan 15(8) dan menyimpan kertas undi atau kertas-kertas lain berserta semua dokumen yang lain dan kemudiannya hendaklah membuat suatu pernyataan fakta sebagaimana yang didapatinya, dengan disaksikan oleh calon atau ejen yang hadir.

Pengundi pos tidak boleh hadir untuk mengundi

19. Seseorang pengundi pos tidak berhak untuk hadir mengundi pada hari mengundi.

Pembatalan

20. Peraturan-Peraturan Pilihan Raya (Pengundian Pos) 1959 [*L.N. 71 tahun 1959*] dan Peraturan-Peraturan Pilihan Raya (Pengundian Pos) (Sabah dan Sarawak) 1968 [*L.N. (F) 184/68*] dibatalkan.

JADUAL

[Peraturan 3, 8 dan 12]

BORANG 1

PERMOHONAN BAGI KERTAS UNDI POS

[Subperaturan 3(2)]

Kepada:

Pegawai Pengurus,

Bahagian Pilihan Raya.....

Melalui:

Pegawai Pilihan Raya Negeri,

Saya,

(Nama penuh dalam huruf besar)

No. kad pengenalan.....

yang beralamat di.....

(Alamat pos penuh)

memohon supaya suatu kertas undi pos dihantar kepada saya di alamat yang di atas kerana saya berhak untuk mengundi melalui pos dengan sebab yang berikut:

*(a) Saya seorang yang telah diperakui oleh Suruhanjaya Pilihan Raya sebagai seorang pegawai pilihan raya yang kena bertugas pada hari mengundi mengikut perakuan di bawah ini.

*(b) Saya seorang anggota Suruhanjaya Pilihan Raya yang dilantik di bawah Perkara 114 Perlembagaan Persekutuan mengikut perakuan di bawah ini.

*(c) Saya seorang anggota perkhidmatan awam dan akan bekerja sepenuh masa pada hari mengundi di

(Jabatan/Pejabat /Pihak Berkuasa)

di luar

(Semenanjung/Sabah/Sarawak)

mengikut perakuan di bawah ini.

*(d) Saya seorang anggota kategori orang yang ditentukan oleh Suruhanjaya Pilihan Raya sebagai pengundi pos mengikut perakuan di bawah ini.

Pada masa sekarang saya didaftarkan sebagai seorang pemilih di:.....

..... di dalam Negeri

Bertarikh

.....
Tandatangan Pemohon

*Potong mana-mana yang tidak berkenaan.

PERAKUAN

Saya dengan ini memperakukan bahawa orang yang dinamakan di atas ialah orang yang disebut dalam perenggan *(a)/(b)/(c)/(d) yang pada hari mengundi akan bertugas/bekerja sepenuh masa dalam jawatan

(Nama jawatan)

di

(Semenanjung/Sabah/Sarawak)

Bertarikh

.....
* Pengerusi Suruhanjaya Pilihan Raya/
Ketua Jabatan

BAGI KEGUNAAN PEJABAT SAHAJA

No. Kod:
No. Kad Pengenalan:
No. Siri dalam
Senarai Pemilih:

- * Permohonan diluluskan
- * Permohonan ditolak dan pemohon telah diberitahu

Alasan:

Bertarikh:

.....
Pegawai Pengurus

* Potong mana-mana yang tidak berkenaan.

Lekatkan
setem di
sini

Kepada:

.....
(Nama Penuh)

.....
(Alamat Pos Penuh)

.....
.....

.....
(Lipat mengikut garisan bertitik)

Tuan/puan,

Dukacita saya memaklumkan kepada tuan/puan bahawa permohonan bagi suatu kertas undi pos yang bertarikh tidak diluluskan atas alasan bahawa.....
.....

Saya yang menurut perintah,

.....
Pegawai Pengurus

Bertarikh

BORANG 2

[Peraturan 8 dan 12]

PERISYTIHARAN IDENTITI

(Sila baca Arahan Kepada Pengundi sebelum melengkapkan borang ini)

No. Kertas Undi

Saya dengan ini mengisytiharkan bahawa saya telah menerima kertas undi yang bernombor seperti di atas dan sampul yang mengandungi kertas undi itu (kedua-duanya saya kemukakan sekarang).

Nama pengundi :

Tandatangan pengundi/cap ibu jari :

No. kad pengenalan/perkhidmatan tentera/polis :

Orang yang tersebut di atas, yang saya kenal secara peribadi, telah mengemukakan kertas undi dan sampul yang tersebut di atas dan telah menandatangani perisytiharan di atas di hadapan saya.

Bertarikh:

Tandatangan Saksi:.....

Nama penuh:

Alamat:.....

.....

.....

No. kad pengenalan/perkhidmatan tentera/ polis:

.....

ARAHAN KEPADA PENGUNDI

[Peraturan 8 dan 12]

1. Sebelum menandakan kertas undi yang disertakan, anda mestilah mengemukakan Borang 2 kepada seseorang yang anda kenal yang akan mengakusaksikan yang berikut:
 - (a) kertas undi yang menunjukkan nombor padanya;
 - (b) Borang 2; dan
 - (c) sampul yang anda terima yang mengandungi Borang 2 dan kertas undi.
2. Anda mestilah menandatangani Borang 2 di hadapan saksi.
3. Anda boleh mengundi sekali sahaja dan hanya untuk SATU ORANG calon.
4. Anda mengundi dengan menandakan pada kertas undi di bahagian sebelah kanan dengan memangkah bersetentangan dengan nama calon yang anda undi, iaitu dengan tanda "X". Oleh sebab undi adalah rahsia, ini hendaklah dilakukan dengan penuh kerahsiaan .

5. Sebaik selepas mengundi, anda mestilah memasukkan kertas undi yang telah ditandakan itu ke dalam sampul kecil bertanda "A" dan menutupnya. Anda kemudiannya mestilah memasukkan sampul bertanda "A", bersama dengan Borang 2, ke dalam sampul besar bertanda "B" yang dialamatkan kepada pegawai pengurus dan menghantarnya kepada pegawai pengurus tanpa berlelah-lelah. Kertas undi itu, supaya dapat dikira, mestilah diterima oleh pegawai pengurus tidak lewat daripada jam lima petang pada hari mengundi.
6. Jika secara tersilap anda menerima lebih daripada satu kertas undi, anda dikehendaki memusnahkan kertas undi yang nombornya tidak bersamaan dengan nombor yang ditandakan pada Borang 2. Ambil perhatian, bahawa adalah menyalahi undang-undang untuk mengundi lebih daripada sekali dalam pilihan raya umum atau pilihan raya kecil yang sama.
7. Jika anda seorang pengundi pos, anda tidak boleh hadir mengundi pada hari mengundi.

Dibuat 29 Mei 2003

[SPR(S) 72/4(21); PN(PU²)178c/XXXIV]

Dengan Perintah Suruhanjaya Pilihan Raya

DATO' HAJI WAN AHMAD BIN WAN OMAR
Setiausaha
Suruhanjaya Pilihan Raya

[Akan dibentangkan di hadapan Dewan Rakyat menurut seksyen 17 Akta Pilihan Raya 1958]

UNDANG-UNDANG MALAYSIA

AKTA PILIHAN RAYA 1958

PERATURAN-PERATURAN PILIHAN RAYA (PENGUNDIAN POS) 2003

SENARAI PINDAAN

| Undang-undang yang meminda | Nama | Berkuat kuasa dari |
|----------------------------|---|--------------------|
| P.U. (A) 165/2006 | Peraturan-Peraturan Pilihan Raya (Pengundian Pos) (Pindaan) 2006 | 05-05-2006 |
| P.U. (A) 114/2012 | Peraturan-Peraturan Pilihan Raya (Pengundian Pos) (Pindaan) 2012 | 30-04-2012 |
| P.U. (A) 143/2012 | Peraturan-Peraturan Pilihan Raya (Pengundian Pos) (Pindaan) 2012 - Pembetulan | 30-04-2012 |
| P.U. (A) 10/2013 | Peraturan-Peraturan Pilihan Raya (Pengundian Pos) (Pindaan) 2013 | 15-01-2013 |
| P.U. (A) 215/2024 | Peraturan-Peraturan Pilihan Raya (Pengundian Pos) (Pindaan) 2024 | 20-08-2024 |

UNDANG-UNDANG MALAYSIA

AKTA PILIHAN RAYA 1958

PERATURAN-PERATURAN PILIHAN RAYA (PENGUNDIAN POS) 2003

SENARAI PERATURAN YANG DIPINDA

| Peraturan | Kuasa meminda | Berkuat kuasa dari |
|-----------|--|---|
| 2 | P.U. (A) 215/2024 | 20-08-2024 |
| 3 | P.U. (A) 165/2006 P.U. (A) 114/2012 P.U. (A) 10/2013 P.U. (A) 215/2024 | 05-05-2006 30-04-2012 15-01-2013 20-08-2024 |
| 7 | P.U. (A) 165/2006 P.U. (A) 10/2013 | 05-05-2006 15-01-2013 |
| Jadual | P.U. (A) 114/2012 P.U. (A) 10/2013 P.U. (A) 215/2024 | 30-04-2012 15-01-2013 20-08-2024 |
